

Mores.

Cedris confitæ, Pinis, Cypressis, Lentiscis, aut Arboribus quæ Mastichen generant, ac multis alijs Arboribus odoriferis. Incolæ mediocri statura, æqui bonique tenaces, iustitiam exercent, Animæ immortalitatem sentiunt, sed saltationibus assiduis, intempestivisque comotationibus ad instar aliorum Americanorum, intemperanter indulgent, a carnibus tamen humanis abstinere. Assiduis venationibus Feras insectantur. Arma sunt Arcus & Sagittæ. Credunt multos esse Deos, quos nuncupant *Mantoac*, sed variorum generum & graduum, atque unicū duntaxat præcipuum ac magnum Deum, qui fuit ante omnia secula. Qui, ut affirmant, cum Mundum condere decrevisset, primum alios Deos ordinis præcipui condidit, quibus tamquam adiutoribus & instrumentis, tum in creatione, tum in gubernatione Mundi uteretur: Tum Solem, Lunam, & Stellæ, tamquam minorum gentium Deos, atque instrumenta alterius ordinis magis præcipui. Primum (ajunt) Aquæ creatæ sunt, ex quibus opera Deorum omnis creaturarum varietas visibilium atque invisibilium existit. Ad genus humanum quod attinet, mulierem primum conditam esse ajunt, quæ opera & adminiculo cujusdam Deorum, concepit ac liberos peperit: atque in hunc modum genus humanum ortum esse asserunt. Sed de Moribus & natura indigenarum, deque alijs Virginie commoditatibus aut mirabilibus plura ex descriptione Ioannis VVytz, & relatione Thomæ Harioti Ralegi domestici, per Theodorum Brium singulari libro descripta, & æneis formis incisa circumferuntur.

Florida.

*Regio & unde dicta.**Situs.**Soli fertilitas.**Animalium varietas.*

FLORIDA (ut obiter etymon ejus exquiram) appellationem habet, quod ipsa Dominica Palmarum reperta sit, quam Hispani suo Idiome *Pascua de Flores* vocant. Inditum ei hoc nomen a Ioanne Pontio Legionensi. Alij inter quos Thevetus, alio referunt nominis originem, nempe quod tota viridis floridaque sit, stratis etiam undis herbis viridantibus: sed penes authorem sit hujus rationis fides, cum nusquam ab alijs consonantia tradantur. Ab Incolis *Jaquasa* dicebatur. Circumscribitur hæc Provincia latissimis finibus, ab Ortū Bahamæ & Leucayas Insulas habet, in Occidente Mexicanæ Provinciæ terminos attingit, a Meridie Cubam & Jucatanas terras respicit, excurrens in modum Isthmi ad centum passuum millia, quaque angustissima est, triginta milliarium Latitudinem occupat. In Septentrione supra Floridam sunt Canada, Virginia, Avanares, & Nova Francia. Regio satis amœna est, & omnium Fructuum fertilis. Magna Incolis annonæ cura: Maizium Martio & Junio ferunt, tertio dehinc mense maturum colligunt ac in publica horrea recondunt, mox singulis pro cujusque necessitate & dignitate distribuunt. Alijs præterea & quidem varijs Fructibus beata, Moris, Cerasis, Castaneis, Uvis, Mespilis, Prunis speciosis quidem aspectu, sed insciti saporis. Sunt & Radices ipsis *Harle* dictæ, ex quibus in annonæ penuria panem conficiunt. Animalia producit varia, Cervos, Hinnulos, Capras, Ursos, Leopardos, Lupos, Canes Sylvestres, Lepores, Cuniculos. Nec desunt volatilia, Pavones, Perdices, Psittaci, Columbæ, Palumbi, Turtures, Merulæ, Cornices, atque alia. Sunt